

# Vun driveriver

---

erscheint auf [www.lenauheim.de](http://www.lenauheim.de)

monatliche  
Erscheinung

Januar 2012

von Helen Alba

## Was is hinne un was vore?

Es is schun immer gsaat gin, dass de Gschmack un die Ohrfeije verschieden sin. Doch ach die Mensche, ihre Gewohnheite un alles Drum un Rum sin verschieden. Was dem eene recht un gut genuch is, des is dem anre nit gebrot. Un mer kann x Beispiele gin.

So a doneilich. Am e Owet ruft es Kathi sei Freindin, es Lissi an un ment: „Schau mol Lissi, mei Enkelin Claudia, des wu jo in die zweitei Klass in der Lenaschul geht, sie han so e Weihnachtsfeier mit ihrer Klass. Tätscht nit ach schau kumme? Die Lehrerin hat gement, es selle doch um so meh Leit in dem Saal sin!“ Es Lissi war ach gleich derbei, weil es is doch scheen, de Kiner zuzuschau un zu horche, was se so alles kenne. Un es froot: „Muscht mer nor saan, wu die Feier is. In dere kleeni oder grossi Schul?“ „Wuher, des is was ganz Nowles. Die Feier is im Hotel `Timisoara`!“ „Was du nit saascht? Im Hotel? Sowas han ich jo noch gar nit gheert! Wie kumme se dann do derzu?“ „Ich muss der saan, in dere Klass lerne ganz vill Kiner aus gut situierte Familien. Un de Vater vun eem Mädli is de Scheef dorte“!

Jetz war em Lissi jo villes klor. Un es hat anfang nohzudenke, wie des vor villi Johre war, wie ach es un es Kathi in die Schul gang sin un Programm gin han. Ganz oft is de Tirolertanz getanzt gin. Un oft war ach es Schneewittchen oder Rotkäppchen uf der Bühne gstann. Zwergle, Pilze un noch vill meh Figure. Es is mitm Reef getanzt gin, die Buwe han oft als Sportler ihre Kunscht gewies. Des alles is em Lissi dorch de Kopp gang, es hat sogar die Bilderschachtel dorchsucht un so manches Bilder vun frieher angeschaut.

Ufmol is em ingfall, es muss doch des Kathi frooe, wu un wie mer in des Hotel ninkummt. Weil es hat noch nie jemande dorte uf de Schlappe getret. Un schun greifts zum Telefon: „Saa Kathi, wu geht mer dann in des Hotel nin?“ „Mir ware schun bei anre Vorstellung dort, mer geht hinne nin. Du bischt jo nit ufs Maul gfall un kannscht frooe!“

Es Lissi studiert e Weil noh: Also, des Hotel is im Zentrum, gleich hinerm „Merkur“. Dorte is e grosses Parkplatz un mer gsieht, wann mer mitm Firopus langscht fahrt, de Portier vor eener grossi Glastier stehn. Also, des heescht, dass dorte de vorderi Eingang is. Doch wu is hinne? Un for was misse die Kiner mit ihre Eltre hinne nin gehn?

Un dann is de Tach kumm, an dem es Lissi sich uf de Wech zum Hotel gemacht hat. Es is schnurstracks uf de Portier zugang un hat gfroot, wu dass mer do hinne nin gehn kann. Der Mann hat grossi Aue gemacht un gsaat: „Des Hotel hat nor eene Eingang. Un des is die Tier do!“ Jetz hat es Lissi lache misse un hat erscht iwerleet, for was es Kathi gement hat, dass hinne eigentlich vore is. Die zwaa sin dann drin im Saal zammkumm un han nochmol mitnaner gelacht.